

劉

氏

鴻

書

第四卷

地理部

地類

定名相地

太章豎亥

禹蹟所被

佛經四洲

四界四派

閻浮提

八玄八極

中國生明

四方五行

奧藏勁方

山林川澤

青徐荆揚

名山比生

地產地無

山河兩戒

共一日月

旦夜四照

三千大千

象氣

聖人出

南舟北帳

有葱有薤

天下九福

江陵衣冠

貢土貢水

天地氣候

不打春

不撞鐘

皇輿

四離九道

中國三支

大有一統

左肩右臂

秦守漢統

秦壤四塞

燕薊形勢

金人都燕

歷代疆理

九鎮

東西南北地

嘉靖貢地

郡鄙

卷四目錄終

劉氏鴻書卷之四

宣城 劉仲達 纂輯

地理部

太史 湯賓尹 刪正

地類

大一金鏡經曰昔燧人氏仰觀斗極而定方名東西南北是也則四方之名蓋自燧皇始定之○後世相地者曰堪輿堪天道輿地道坤輿坤爲地輿車底也○禹使太章步自東極至於西極二億三萬三千五百里七十五步使豎亥步自北極至於南極二億三萬三千五百里七十

五步

淮南子

地東西二萬八千里南北二萬六千里名山五千三百七十出水之山八千里受水者八千里出銅之山四百六十七出鐵之山三千六百九十此禹蹟之所被也

覽

佛經有四州之說謂中國爲南瞻部州天竺諸國皆在其中東弗于建州西瞿耶尼州北鬱單越州四州統名娑婆世界

鉛槧

須彌山乃崑崙山之別名也是天地骨中鎮天心爲巨物如人脊背與頂梁生出四枝龍突兀四枝分作四世界南北東西爲四派西北崆峒數萬程東入三韓隔杳

冥惟有南龍人中國胎宗孕子來奇特黃河九曲爲大
腸川江屈曲爲膀胱分枝劈脉散亂去血脉勾連逢水
住大爲都邑帝王州小爲郡縣居王侯其次偏方爲鎮
市亦有富貴居其地按南龍入自中國派爲三大幹龍
北條出河北入雲中九疑鴈門岱郡復回南而太原華
山太行恒山派九河東北度遼海以入於海爲兗冀之
分中條出河南自秦壟三嶽入豐沛汾潁伊洛東而淮
泗以入于海爲雍豫青徐之分南條出河南自陝右分
西都回巴蜀踰荆衡入黔中東入匡阜南極嶺海東北
渡閩粵跨三吳自浙右以入於海爲梁荆揚之分

黑囊

經

須彌山東天下名東弗于人壽三百西名西瞿耶尼人
壽三百南名南閻浮提人壽百歲北名北鬱單人壽千
歲長倍三天下人間浮提今中國四夷皆是也中國稱
震旦又稱人國則自天竺名爲閻浮提之一也

宛委餘

編

崑崙東北地轉下三千六百里有八玄幽都方二十萬
里地下有四柱焉柱廣十萬里有三千六百軸互相牽
制之八極之廣東西二億三萬三千里南北二億三萬
一千五百里

立覽

中國月之生明必於初二或初三日而西域有尋斯於城於中國之朔夕月卽見於西南中國生明之夕月去地纔一舍許而交州遇生夕月已在天之中心此豈里差之所致耶然史載安息西界循海曲亦至大秦迴萬餘里於彼國觀日月星辰無異中國然則又何也里差乃占步之一法猶所謂歲差云爾

宇宙有四方東銅南海西林北沙

黔類

又五行東方木

而丹章有金銅之山南方火而交趾有大海之川西方金而蜀隴有名材之林北方水而幽都有積沙之地口水人輕遲水人重中土多聖人凡土地有龜龍之體有

麟鳳之貌有弓弩之勢有斗升之象有張舒之形有塞
閑之容有隱真之安有累露之危有膏英之利有培塿
之害此十形者氣勢之始終陰陽之所極也計九州之
別壤山陵之大川澤所注萊沮所生鳥獸所聚九百一
十一萬八千二十有四頃磽塉不墾者千五百萬二千

頃
文選

東南天地之奧藏其地寬柔而卑其土薄其水淺其生
物滋其財富其人剽而不重靡食而儉生其土懦弱而
少剛笮之則服西北天地之勁方雄尊而嚴其土高其
水寒其生物寡其財確其人毅而近愚食淡而輕生土

沉厚而慧撓之不屈

事物紀原

山林民毛而方其物毛阜川澤民黑而津其物鱗橐丘
陵民專而長其物羽竅墳民哲而瘠其物介陝原隰民
豐肉而痺其物羸叢

王氏藻苑

青徐角羽集寬舒遲人聲緩其泉鹹以酸荆揚角徵會
氣漂輕人聲急其泉酸以苦梁州商徵接剛勇漂人聲
騫其泉苦以辛兗豫宮徵合平靜有慮人聲端其泉甘
以苦雍冀合商羽端駛烈人聲捷其泉辛以鹹

玄覽

禹曰天下名山五千三百七十居地六萬四千五十六
里出銅之山四百七十六出 鍤之山三千六百九十

天地所以均有無通萬物者也

鹽鐵論

東方有比目魚

焉南方有比翼鳥焉西方有比肩獸焉北方有比肩民

焉

指南

淮北多獸江南多禽湖廣多魚雲南多花廣西

多樹川蜀多藥○山東無虎浙江無狼廣東無兔蜀無

鶴

國憲家訓

天下山河之象存乎兩戒北戒自三危積石負終南地
絡之陰至濊貊朝鮮謂之北紀天所以限戎狄爾戒自
岷山嶓冢負地絡之陽至東甌閩中謂之南紀天所以
限蠻夷河源曰北河由北紀首達華陰與地絡會又分
而東流與涇渭濟瀆相表裏江源曰南河自南紀首達

華陽與地絡會又分而東流與漢水淮瀆相表裏觀兩河之象與雲漢之終始而分野可知矣

唐法象志

華嚴經云四天下共一日月爲一世界有千世界有一小鐵圍山遶之名曰小千世界有一小千世界有中鐵圍山遶之名曰中千世界有大鐵圍山遶之名曰大千世界此三千大千世界○又云四天下者須彌山南曰閻浮提山北曰鬱丹越山東曰弗波提山西曰瞿那尼山其日月一旦夜照四天下

數術記

一世界者一日一月一四天一三十三天一夜摩天一梵率陀天一樂變化天一他化自在天一梵天此名一

世界如此一千箇世界名小千世界又如此一千箇小
千世界名中千又如此一千箇中千世界方名大千故
文中有百億須彌山百億日月等說

阿含經

凡地皆象其氣皆應其類山氣多男澤氣多女障氣多
嗜嵐氣多聾林氣多癘木氣多偃岸下氣多瘡石氣多
力險阻氣多癭暑氣多天雲氣多壽谷氣多痺丘氣多
狂衍氣多仁陵氣多貪輕土多利重土多遲清水音小
濁水音大湍水人重中土多聖人皆應其類也

太平御覽

海水三歲而一周周則流波相薄而地動名山五百歲
而一開開則金玉之精涌焉丹丘千年而一燒燒則真

人聚焉黃河千年而一清清則聖人出焉

文覽

豫章一遼僧嘗曰南人不信北人有千人之帳北人不信南人有萬斛之舟蓋土俗然也法苑珠林云山中不信有魚大如木海上不信有木大如魚胡人見錦不信有蟲食樹吐絲所成吳人身在江南不信有千人氍毹帳及來河北不信有二萬碩船正與遼僧談合

名山藏

山中有蔥下必有銀有薤下必有金有薑下必有銅錫山中有玉者木旁枝下垂謂之寶苗

雲仙友議

天下有九福京師錢福眼福屏帷福吳越口福洛陽花福蜀川藥福秦隴鞍馬福燕趙衣裳福美女福○江陵

號衣冠藪人言琵琶多於飯甌措大多於鯽魚

珍珠船

天下貢賦惟長安縣貢土萬年縣貢水

南部新書

若耶溪旦必南風暮必北風瓊海半月東流半月西流
點蒼溪上大雨野中烈日金筑聖泉潮汐百刻閩中溫
泉左寒右熱莆陽霞墩井左重右輕江乘之泉半溫半
冷共出一壑句容之湖熱魚寒魚交人輒死天地氣候
有不可窮詰者

文海披沙

徐州不打春邳州無東門若使打春與開門蝎子咬殺

人七脩類藁

東昌亦有諺曰夏津不撞鐘高唐無北門

撞鍾人頭痛北門生蝗蟲相沿至今不敢易也

文海披沙

皇輿

地者萬物之祖元氣所生也東至泰遠西至邠國南至
濮鉛北至祝栗謂之四極東有九夷北有八狄西有七
戎南有六蠻謂之四海有五嶽以應天之五形五嶽者
卽中嶽嵩山南嶽衡山東嶽泰山西嶽華山北嶽恒山
也有四瀆以應天之四離四瀆者江淮河漢也有九州
以應天之九道東南神州曰辰土正南邛州曰深土西
南戎州曰滔土正西弇州曰开土正中冀州曰白土西
南杜州曰肥土北方玄州曰成土東北咸州曰隱土正
東揚州曰信土九州之外有八埏八埏之外有八紘東

北之紘曰和丘曰荒土東方之紘曰棘林曰桑野東南之紘曰大窮曰衆女南方之紘曰都廣曰反戶西南之紘曰僬僥曰炎土西方之紘曰金丘曰沃野西北之紘曰一目曰沙所北方之紘曰積冰曰委羽此言地之大勢然也又有爲北戒南戒之說者北戒自積石負終南地絡之陰東及大華踰河並雷首砥柱王屋太行北抵常山之右乃東循塞垣至濊貊朝鮮是謂北紀所以限戎狄也南戒自岷山嶓冢負地絡之陽東及太華連商山熊耳外方桐栢自上洛南逾江漢攜武當荆山至於衡陽乃東循嶺徼達東甌閩中是謂南紀所以限蠻夷

也故星傳北戒爲胡門南戒爲越門有云渤溟漲洋所以限東徼也惡溪沸海所以限南徼也陷河懸渡之設乎西瀚海沙漠之設乎北所以遮西而制北激瘴霧於東維界黑水於南極泄流沙於西湮決弱水於北滅所以界四維也此以中國之地勢言之也帝王御極能使中國順治而四夷來王斯可以語全盛矣慎勿恃久安而忘戰備致帝王所自有之地一旦淪於夷狄而不悔也彼志在滅胡而窮兵贖武以致海內虛耗昔人謂得其地不可耕而食得其民不可役而使縱使慕南無王庭於中國又何益乎唐地志曰自古爲天下者務廣德

不務廣地斯言其御世之良策哉

三餘筆錄

地脉向中國來者三支北絡發崑崙東折而東南行其背爲北狄其正結爲冀都其支結爲燕京其餘氣爲東夷冀都向雲中上黨剝換來三面繞河外案多疊大河東北徂入海重重包裹但四旁險阻貢輸非後世所便河且徙而南氣乃洩燕京雖非隴結旺氣時乘其藩籬單薄漕水慮滯可以完緻只河引而南略具耗孔中絡發崑崙東南至岷山由屬隴轉北而東爲終南長安之地也金陵四塞以爲固古豪傑有取焉貢輸艱入後世費繁今非所處由關中出至太華中嵩伊闕已鑿是謂

洛陽洛陽天地之中陰陽和南北平百物會同公營之
地氣自北以南人事化機互以爲用古今固不齊也行
乃盡於東泰翻身顧祖東海外盪河江前向萃產賢貴
凝聚有因後世河徙截其來脉者三四其力遂微南絡
發崑崙迤東南而行至大峨山其背爲西戎直南折而
東爲五嶺其餘氣爲南蠻復折而東北大盡於建康其
支給爲吳閩越大峨而下至於五嶺環抱中原情無南
面力雄勢坎吳閩越支疑謫力海水陽勝明有餘而氣
不足以當之金陵一大都會長江天塹財用易輸持護
不少世謂江左不得於宅中偏安不可以圖大是安於

建康之說不能用建康於天下夫安於建康乃河大勢
不拱東壩未立秦淮河不湧邗溝尚微故建康俗狃於
自便知守江而不知用淮于江知圖淮而不知用天下
於淮知據武昌之上游而不知上游之守鎮知集貨之
易而不知散貨以用于四方知南兵之難振而不知練
兵於北之可用故金陵不可以故常論

真誠通

國家大有一統東盡遼左西極流沙南越海表北抵沙
漠兩京並建以京畿府州直隸六部分天下爲十三布
政司統諸府若州若縣都司衛所錯置交制爲府一百
四十四爲州三百二十二爲縣一千一百五十有四我

朝幅幘廣矣洪荒之世無論已禹分天下爲九州北直隸山西屬冀陝西屬雍四川梁山東爲青爲徐爲兗河南豫冀兗南直隸江西浙江福建廣東雲南皆揚湖廣荆而廣西貴州正朔猶未加也周之時西不盡流沙南不盡衡山東不盡東海北不盡恒山而其餘聲教猶未及也三代之疆域可考已漢時蘇武使匈奴其牧羝處則陝西鎮番衛也山因以蘇武名王昭君嫁匈奴其墓處則山西大同府也西地多白草此冢獨青賈捐之請棄珠崖則廣東瓊州府也入海地方千里漢之疆域可考已唐南詔雄鎮於蒙氏則雲南諸夷也維州浸陷於

吐蕃則四川諸夷也逮中葉盡河北而失之宋燕雲淪
沒於遼金則北直山西也西夏竊據於興州則陝西寧
夏也及南渡胥中原而棄之唐宋之疆域可考已今日
之盛豈非亘古獨隆者乎雖然覩形勝而思經濟貴通
其要焉蓋嘗論之天下大勢譬人一身京師元首也而
朝廷政令出焉則心也四方四體也薊門遼陽上谷雲
朔者肩背也河渠咽喉也伊洛湘漢江淮之間腹也齊
魯秦晉左右手也閩蜀腋也交廣滇粵足也肩背欲厚
咽喉欲通腹欲實左右手腋欲強足無跌盩相承而奉
元首以聽命於心而心與元首則又精神所聚會以運

用百體而榮衛注焉然後形氣充悅而外邪不好也
當國家之任者可以深思而曲處矣封疆之臣可不講
乎

新知錄

愚按天不滿西北地不滿東南天地之大也猶然無全
用况帝王之統馭乎顧長官宣慰本非孝順子孫而朔
方河湟猶係職方版籍在廟堂之石畫固計萬全而虜
蕘之管窺思陳一得竊謂泰寧內徙則露華夏之左肩
河套陸沉則續匈奴之右臂况都圻密邇遐荒薊鎮總
堂皇之地黃河與我共險靈鹽多肘腋之虞長慮却顧
者似不容度外置之也至於諸夷喜則人怒則獸故變

亂易起紛爭而敗之易養之難故撲滅每延歲月况田
州久勞撫勦而蘇盧竟爾逋誅湖苗方肆齧蹄而貴苗
同時煽動招攜懷遠者似不可以疥癬視之也自脅貢
者得比秦寧遂肆意甘爲向導復套者一蒙顯戮致絕
口不議驅除然把漢一被拘留而三衛竄謀關外台吉
偶驚伏發而數載不犯雲中中材尙可捍虜未有得人
而西北不可禦者若撫東南者微患之不當身每因循
于歲月值變之竊發于已率避法以文移然謫致公丁
而峽寇甘心服罪計誅龍保而田勉俛首乞哀少算猶
可就功未有得策而東南不可撫者卽策得矣人得矣

而當事者猶有六難焉思議者嗤此說之爲非必多方以撓其事護前者恥已言之不售必中沮以敗其成功不能一舉而收將以玩寇致罪師欲因用間而動又以通虜招尤謀始而疑其發大難之端則兵未興而讒已啓事定而責其保百年之患則功甫就而禍亦基得策得人而難且如此况并策與人而不得乎天下之事所以日復一日而終莫之舉也

分合志 幅輳總論

愚按秦之置守也漢統以州牧而專制發難於袁曹唐易以藩方而旅拒肇端于河朔及支郡牒領兵而橫海稱順命文臣知州事而節度釋兵權至是而征伐之柄

一指臂之勢成僉謂令長之設可百世以俟聖人然弱天下者固令長而撫天下者亦令長必令長能行其志而後天下始遂其生其在於今統之以郡守約之以監司糾之以臺憲而別其殿最以達之銓司制亦詳且備矣但雌黃因品格豈曰稱情毀譽視趨承孰云核實緣催科以殿最何以妨撫字之勞任命運以爲遷除豈得稱量才之授遴選果精乎改節于宦成者每借資于夙譽先容於權要者或見庇于當途喜事而用壯者竊名于果敢矯情而飾節者係迹于潔廉鑒別果審乎待哺者計期于旦晚以申請而緩其賑施負屈者久淹于歲

年據成案而難于平反寃欲伸于富室寧坐視以引嫌
刑或犯于權臣顧屈法以避禍守果得自專乎名譽不
事上官則以蔽其賢者尤其抗練習迥超同列則以媒
其短者忌其長報政責其速成則得民難于子產長才
局于短馭則百里失之士元才果能自見乎網裁花石
傷必中于逮捕戶損晉陽謗必速於鯨曠破張讓之柱
則議束于濕薪緩兒寃之形則比錫於著帽淑果盡旌
乎謂清流之可恃者或肆志於恣睢阻進取之無階者
每灰心于策勵一長偶售於知遇信耳者必主以成心
微青少掛于指陳則求全者難益以晚節慝果易別乎

大抵人不易知而當用其知于迹之外法不可廢而當通其變於法之中若醴泉徵諸父老則荐舉外尤貴旁求卽墨毀以要津則糾刺中亦當甄別薛宣移兩縣而皆治豈容以爲人而擇官何武以去後而見思不必以銜長而課最如是而又時嚴濫舉之罪間加不次之遷大破常格以待循良重示誅譴以鋤貪墨則兩岐五袴在在多樂利之民而三異四知人人重清白之守矣猶有說焉縣令固通之天下矣若畿甸之外宜如漢制設三輔以衛京師邊塞之間宜倣宋初分節度以守要害則外之進攻退守屹乎百仞之金湯內之居重馭輕巍

然萬世之磐石有經國之志者幸毋忽意于斯

分合志

郡國總論

夫秦四塞之壤也雖偏鎮於西隅而國之形勢實爲天下雄固帝霸之業也若夫盤互而秀於南者則終南太乙焉隆隆乎陰於西極而東望潼關者則華嶽焉東注咸陽則澧水之所導也其境有蘭池阿房之宮咸陽之南周之鎬京也茫茫四陵南北相望秦宮所營澧其鬱焉豈惟涇水之望陵哉西北臨乎豳國而奕奕者其梁山也細縕而蒼蒼內有離宮別館昆明西陂輦道紆曲而相屬者秦之上林也鬱然起于鄠之東南者有紫閣

峰焉其周之靈臺廢也久矣橫亘乎藍田者有秦嶺焉
霸水之所出嶢關之所鎮也截于西域而嫫姚之所開
者其玉門之關乎環于漢陽而微茫者其鳥鼠乎限於
北漠之陲匈奴倚垣而窺者此秦之長城紫塞也扞蔽
乎朔方而胡笳戰馬之所集者其賀蘭之山乎聲下龍
門景入太華而浩蕩者黃河也而瀑布之潏漾者則太
白焉荆山峙於河則大禹鑄鼎之墟也若夫太液曲江
之池樂游細柳之原驪山之溫泉新豐之枌社隴山之
九坂長安之章臺又有博望西郊芙蓉未央長樂建章
甘泉之宮不可勝數其近而羅列者皆鍾秀於雍州其

遠而環帶者皆隱耀於關中也

名山記

自古中原無事則居河之南中原多事則居江之南自然之勢也成周以來河南之都惟長安洛陽江南之都惟建康其次則有襄鄧焉唐朱朴之議曰襄鄧之西夷漫數百里其東則漢輿鳳林爲之關南則菊潭環屈而流屬於漢西有上洛重山之險北有白崖聯絡誠形勢之地沃衍之墟若廣浚河渠漕輓天下可使大集此建都之極選也雖然皆未有及燕薊之形勢者太行盤盤自西而北居庸古北松亭等關北瞰沙漠南引江淮土厚水深博大爽愷其人沉鷲才勇杜牧所謂王不得

霸不不得霸之地豈非天遺其勝以貽我朝萬世帝王之

業乎

震澤長語

京師古幽薊地左滄海右太行北居庸南河濟古稱天府之國遼金元常於此建都予嘗考之金人克遼滅宋都燕山故城在今北京城之西南十里今禁垣內所存瓊花島梳粧臺皆金故物也瓊島卽蒙古輦貢之石積而爲山粧臺則章宗所營以脩李妃行園而添粧者都人訛爲蕭太后梳粧樓章宗偕妃登臺得二人土上坐之句妃卽以一月日邊明爲對今以地方計之臺島卽今萬歲山太液池等在金時當介都城東北隅入元改

築城隍國朝因之前山池臺島則在禁蘄之西南矣我
太祖時爲北平布政司成祖龍潛於此及續大統遂建
北京其時尤稱行在正統中始稱京師云南京古金陵
地周末時已有王氣秦始皇謂東南有天子氣諸葛亮
謂龍蟠虎踞真帝王都卽此吳晉宋齊梁陳及南唐嘗
於此建都我太祖乃定鼎於此山東古青兗二州地
漢於青州兗州各置刺史唐宋因之東西分治元始合
爲東西道宣慰廉訪司山西古冀州地漢分冀西境置
并州部刺史唐置河東道宋置河東路元置河東山西
道宣慰廉訪司陝西古雍州地漢都於此置司隸校尉

領三輔置涼部刺史唐初置關內道已而置京畿關內

隴西南平等道宋初置陝西路後置六路元置陝西行

中書省及陝西漢中道廉訪司甘肅等行中書省及河

西隴北道廉訪司我朝始合爲一置陝西布政司而設

行都司分治甘肅云河南古豫州漢置豫州刺史唐置

河南道開元置都畿河南河北三道宋都汴置京東東

西二路元置河南江北行中書省廉訪司我朝置河南

布政司浙江古揚州地漢會稽郡兼統兩浙隸揚州部

刺史唐貞觀中隸江南道後增置江東道宋初以兩浙

爲一路後浙東西爲兩路元置江浙行中書省及浙東

浙西二廉訪司我朝合兩浙置浙江布政司江西古揚州地漢領以揚州部刺史唐隸江南道後分爲江南江西道宋置江南西路元置江西行中書省及江西湖東道廉訪司湖廣古荊州地漢置荊部刺史唐貞觀中領以江南道後增置十五道宋置荆湖南北二路及京西南路元置湖廣行中書省及江南湖北道荆湖北道山南江北道湖廣道嶺北湖南道宣慰廉訪司我朝合置湖廣布政司四川古梁州地漢置益州部刺史唐貞觀中置劍南道後置劍南并山南東山道宋爲四川路後分東西兩路又分益慶利夔四路元置四川行中書省

及置西蜀四川道廉訪司福建古閩越地漢以揚州刺史領之唐初隸江南道後隸江南東道大曆中始置福建觀察使宋置福建路元置福建行中書省及福建宣慰廉訪司廣東古北越地漢置交州部刺史唐貞觀中置嶺南道後分爲嶺南東道宋置廣南東路元置廣東道又置海北海南道宣慰廉訪司隸江西行中書省我朝改置廣東布政司廣西古百粵地漢領於荆交二州部刺史唐以其地隸嶺南道後分爲嶺南西道宋屬廣南西路元置廣西兩江道及嶺南廣西道宣慰廉訪司俱隸湖廣行中書省至正末置廣西行中書省我朝因

之雲南古梁州南境爲徼外夷地漢置益州郡領於益州部刺史自唐至宋爲蒙氏段氏所據元置雲南行中書省及廉訪司又置曲靖臨安大理金齒等處宣慰司貴州古西南夷羅施鬼國地元置八番順元等處軍民宣慰司本朝洪武初以其分隸湖廣四川雲南三布政司永樂十一年始置貴州布政司

國憲家猷

元分天下爲十一省二十三道每州皆爲路在內爲中書省在外爲行中書省按歷代疆理天下三代分天下爲九州或十二州秦分天下爲三十六郡漢分天下爲十三部一部六郡晉分天下爲十五道唐十道宋分天

下爲四京三十三路此其大略也

草木子

遼東鎮北拒諸胡南扼朝鮮東控福餘爲神京左臂領
衛二十五所十一關二營堡二百七十薊鎮自山海抵
居庸延邊千里與虜爲鄰賴重巒天險領城十二關一
百一十三寨七十三營四十三堡六十二宣府鎮自東
徂西邊長千餘里藩屏陵京領衛十五所十六城三東
抵黃花鎮西抵大同平遠堡大同鎮自宣鎮西陽堡至
山西邊丫角山六百四十餘里東北連諸胡西接套虜
九邊中之絕塞領八衛七所五百六十三堡山西鎮東
自丫角山起西至老牛灣邊界一百餘里外借大同以

爲藩籬內恃三關爲捍蔽領關三堡三十九口十九延綏鎮東自黃甫川西至定邊營界長一千五百里爲套虜充斥之地領營六堡二十八寧夏鎮自延鎮而西至固原邊界一千八百餘里東起鹽池西盡中衛東南距河爲險北倚賀蘭爲固領衛六所七營四堡十八固原鎮自寧鎮起西至甘肅邊界二百餘里向稱腹裡領衛所七關一營堡四十八寨七十甘肅鎮自固鎮起西至嘉峪關治邊一千五百餘里西控西域南隔羌戎北蔽胡虜孤懸絕塞八衛三所一關五十三壁

皇輿攷

東起朝鮮西至嘉峪南濱海北連沙漠道路紆縈各萬

餘里記四夷入貢者共四十九處

廣輿記

嘉靖以前四

夷入貢各國東北朝鮮等二東日本一南安南占城等
六西南淳沱等四十九西哈喇等四十六西北哈密等
七百朵顏韃靼等二

職方攷

都者美也鄙者陋也詩云彼都人士史記云五段大夫
荆之鄙人也以帝王所居文物整齊士女閒雅皆可美
者故其處曰都民士亦曰都人以邊陲郊野風俗踈略
人物醜陋皆可鄙厭故其處曰鄙民士亦曰鄙民左傳
子產治鄭都鄙有章

鉛槧

劉氏鴻書卷之四

終

第五卷

地理部二 山水總

古今河源 人鳥山 名山大水

泰華裁眉 三峯 五臺

岱宗 海山 三峨

兩眉 九子 驢山

水類

北條南條 金明珠 七木

二十年 錢塘 水晶

水赤 水德 秦淮

遏水

孕水

水脉

八功水

水閩

水搏

嗜水

建業水

中冷水

水遞

水鑿

空瓶

湯泉

鹿泉

三泉

醴泉

油泉

石室

石言

石女

石人

斬石

化石

石鳥

石鼓

石棋

石根

石丈

石臼

池井洞劫灰土海

潮附

火池

井鬼

石龜

井丹

洞墨

昆明灰

女媧搏土

舉塊

猶土

化土

益土

嗅土

乳田

龍宮

無障礙土

香水海

四海

五里十里

石塘

然海

海神

夢神

海水

海潮

浙潮

潮溺

河江湖城

巨靈手

首陽秦華

黃河清

清河公

親家翁

詰河

息濤

三百千錢

謝公怡然

楊林出火

灌口

蛟湖

不夜城

築城

高城

秦城

江陵城

遷城

夫人城

奔牛城

修城

塞關市巔溝澤陵墓

紫塞

虎牢

新豐

玄柱

鹽澤醋溝

藍田

下馬陵

上陵磨刀

七女塚

白楸棺

九原

四危

三公

狼子

夢齧

勿封土

發陵

古墓

聖人墓

相墓

孫權墓

燕山墓

卷五目錄終

劉氏鴻書卷之五

明 宣城劉仲達

纂輯

太史湯賓尹

刪正

地理部二

河山水嗜水泉石

古今河源之說異禹貢云導河自積石未窮其源也漢張騫云河有兩源一出於闐一出葱嶺唐薛元鼎云得河源於崑崙之水赤黃黑青色以方異穆天子傳言陽紆之山河伯所居是惟河宗佛書言阿耨達山有大淵水卽崑崙也其山名往往不同者或古今變易或番漢

異稱耳按潘侍讀昂霄河源志今朝之究河源蓋得之
目覩非傳聞者也太祖嘗征西夏過沙陀至黃河九渡
九渡者在崑崙西南憲宗命皇弟旭烈征西域凡六年
拓地四萬里而河源在域內矣至元庚辰世祖命臣都
實往西域將城其地以通互市自河洲行五千里抵河
源及還圖城墉位置以聞上悅以爲吐蕃都元帥領工
徒以往使其弟闊闊出馳奏大臣阻之次年還河源在
吐蕃西鄙有泉百餘竇地方七八十里皆沮洳不勝人
跡泉不可逼觀登其旁嶺下視竇歷歷如列星然故名
火敦惱兒火敦者漢言星宿也腦兒者海也星宿海合

流而東匯爲二澤復合流始名黃河然猶清可涉河折
爲九卽九渡也廣五七里下復合流漸遠水益渾土人
抱革囊騎過之其聚落之處多編木如舟以濟附以毛
革中僅容二人又東則兩山峽束廣可一二里或半里
深莫測矣崑崙腹頂皆雪盛夏不消河過其南距山麓
僅五六十里又南爲四達之衝地多盜常鎮以兵崑崙
之西人民少山居其南山峻獸有旄牛野馬狼狽獐羊
之屬東則山益峻而地漸下岸至狹或狐可躍渡河至
貴德州始有官治歷積石至河州東北流歷蘭州鳴沙
州應吉里州流正東自星宿海至漢地河南北小水旁

注者衆其山或草或石至積石始林木暢茂世言河九
曲而彼地有二折云漢書言葱嶺河至蒲昌海水泆流
而出臨洮今洮水自南下非蒲昌也土人言於闐葱嶺
水下流散之沙磧則其泆流信然然其後出者莫知矣
或又云黃河與天通又云崑崙去嵩高五萬里閭風玄
圃積瑤華蓋仙人所居皆妄也世多言河出崑崙者蓋
自積石而上望之若源是矣而不知星宿之源在崑崙
之西北東流過山之南然後析而抵山之東北其遶山
之三面如玦焉實非源於是山也然凡水者山之血脉
也山高而廣則其水必衆而鉅崑崙至高廣者也而謂

無一水源於其間邪其不言之者蓋欲破昔之謬著今之奇故略之爾延祐中闕闕出爲翰林承旨潘侍讀與同寮稔得其深言云

名山記

人鳥山經云佛經稱須彌山卽人鳥山又名玄圃山或名大地金根山本無妙玄山元氣寶洞山神玄七轉觀天山幕布三百六十億萬里自然七寶宮殿爲元始天尊治按佛經稱須彌山頂爲帝釋天所居山頂四面峰挺出各高七百由旬金銀琉璃玻璃真珠車渠瑪瑙之所莊校然其上復有諸天道經所稱人鳥山在諸天尊處差覺不同

弇州別集

天下有名山八五在中國泰山華山少室太室首陽三
在外夷天下有大水三黃河長江并鴨綠然鴨綠江亦
在外夷

皇輿攷

天下名山太華險絕峩眉神奇武當偉麗天臺幽邃鴈
岩武夷工巧桂林空洞衡岳挺秀終南曠蕩太行逶迤
三峽峭削金山孤絕武林西山借土木之助太岱匡廬
在伯仲之間北岳不及崧高五臺勝於王屋鴈宕無水
武夷可舟望遠則峨眉登高則太華水則長江洶湧黃
河迅急兩洞庭浩淼巴江險峭錢塘怒激西湖嫵媚嚴
陵清俊灘江巧幻至於朝日如輪晚霞若錦長風巨浪

海舟萬斛觀斯至矣勝斯盡矣思之躍然

五岳遊草

我眉山在蜀爲最高峻蓋衆山盤礴而成山有三峰曰大我峰中我峯曰小我峰登大我夜半可望日出齊之泰岱楚之武當皆不及也李太白所稱我眉高出西極天羅浮直與青溟齊者非妄九月前可上十月則雪已封徑不可上矣山之深邃處六月雪尚未消山僧最富而衆多至五六百每辦半歲衣糧以待冬春之用

國憲

家猷

五臺之嶺峨眉之顛冬夏積雪雲中五原鴈門之野唾出口而成冰六月必裘番禺之南真臘之域四時恒炎

人不知有霜雪山東濟寧分水之關北距東昌臨青地
降九十尺南距徐州沽頭地降百十有六尺桂林之壤
視長沙番禺高千丈

玄覽

岱宗之高四十里衡山四千一十丈華山五千仞恒山
三千九百丈嵩山少室八百六十丈天台一萬八千丈
羅浮三千丈青城三千六百丈黥山一千一百七十丈
天目七千五百丈武夷五百仞崑崙一萬一千里

方輿

勝覽

海山微茫而隱見江山嚴厲而峭卓溪山窈窕而幽深
塞山童頰而堆阜

月日志

三峨高出五嶽秀甲九州震旦國第一山也

書記洞詮

蛾眉山本以兩山相對如蛾眉然故名字當從虫不當

從山

名山記

九華山錄云峯巒異狀其數有九故號九子李白以九峰如蓮花更號九華劉禹錫云九華山自是天地一尤物夫銳而出者爲虎牙尖而背者爲熊耳角而巘者爲牛首冠而峭者爲雞頭

王涯仙掌巒

秦始皇驅山岳擬塞東溟嘗役鬼移之山勢欲動忽有仙人叱鬼以身扼厓石使不得去今厓上有肩帔簪冠隱然遺跡溫潤光澤苔蘚不生以手摩拭良久作古桂

香云祖龍求仙徒用力駕海欲驅山下石神人倚住不
與行留得岩前隱仙跡

名山記

水類

長淮界南北而別江河自淮以北爲北條凡水皆宗大
河自淮以南爲南條凡水皆宗大江淝淮也渦潁也濉
汴也洙泗也濟洛也漳汾也滹沱也灤路也洮渭也皆
以河命者也吳淞也錢塘也曹娥也劍浦也章貢也漢
也湘也賀也左蠡也富良也皆以江命者也川莫大於
江河天下中川百三十有五小川千二百五十有二水
泉三億三萬三千五百一十九遐荒絕域者不與焉

玄

有黃金處水必清有明珠處水必媚有子鮒處水必腥
腐有蛟龍處水必洞黑不可不辨也

尊生八牋

第一揚子江南冷第二無錫慧山寺泉第三蘇州虎丘
寺泉第四丹陽縣觀音寺井第五揚州大明寺井第六
吳松江第七淮水最下

劉伯芻論

第一廬山康王谷水

濂水第二無錫慧山水第三蘄州蘭溪石下水第四峽
州扇子峽下蝦蟆口水第五蘇州虎丘泉第六廬山招
賢寺下方橋潭第七揚子江南冷第八洪州西山瀑布
第九桐柏淮源第十廬山龍池山頭水第十一丹陽觀

音寺井第十二大明寺井第十三漢江金州中零水第
十四歸州玉虛洞香溪水第十五商州武關西洛水第
十六吳松江第十七天台西南千丈瀑布第十八柳州
圓泉第十九嚴陵灘水第二十雪水

陸羽與李季卿論

武林之錢塘在縣東一里許郡曹華信家議立此塘以
防海水始開幕有能致一斛土者卽與錢一千旬月之
間來者雲集塘未成而不復取於是載土石者皆棄而
去塘以之成故改名錢塘

臨安志

凡水晶山水上江水次井水下山水乳泉石池漫流者
上瀑湧湍瀨食久令人頸疾江水取去人遠者井取汲

多者

茶經

周景王時晉龍門河水赤三日貞定王時晉河水赤三日考王時晉龍門河水赤三日時皆王室卑弱大夫專政國亂之兆

顧夷子與子華游於東池子華曰水有四德沐浴羣生澤流萬世仁也揚清澈濁蕩去滓穢義也柔而難犯弱而難勝勇也導江疏河變盈流謙知也

顧子

秦始皇東遊望氣者云五百年後金陵有天子氣於是始皇於方山掘流西入江亦曰淮今在潤州江寧縣土俗因號秦淮

晉陽秋

昔洛水泛洑漂落被害者衆津陽城門校將築以遏水
諫議大夫陳宜止之曰王遵臣也水絕其足朝廷中興
必不入矣水乃造門而退

水經

漢末零陽郡太守史滿有女悅門下書佐乃密使侍婢
取書佐盥手殘水飲之遂有姪已而生子至能行太守
令抱兒出使求其父兒匍匐直入書佐懷中書佐推之
僕地化爲水窮問之具省前事遂以女妻書佐

搜神記

孫權赤烏八年遣校尉陳勛漕句容中道鑿破掘得一
黑物無首尾形如數百斛船長數百丈蠢蠢而動有頃
悉融液成汁時人莫能識得此之後獲泉源或謂是水

脉每至大旱餘瀆皆竭唯此巨流焉

異苑

梁天監有僧曇隱寓蔣山乏水有龐眉叟曰余山龍也知師渴措之無難俄而一沼沸出後有西僧至曰本域八沼已失其一卽竭彼以注此也其水一清二冷三香四柔五甘六淨七不噎八蠲疴也謂之八功德水

旌林

伐山

宋紹興十四年樂平水闢有司奏曰河衝里田水中類爲吸聚勢高平地數尺不假隄防而水自行里南陳氏家井水溢亦高數尺夭矯如長虹聲如雷穿墻毀壁二水闢於杉墩且前且卻約十餘刻乃解正德中文安縣

水忽僵立是日天大寒遂凍爲冰柱高五丈四圍亦如之中空而旁有穴後數日流賊過文安鄉民入冰穴中避之賴以全者頗多土人謂之河僵亦前史罕見也

水經註

貴州普定衛有二水一曰滾塘寨一曰開蛙池相近前後吳人從軍至此夜聞水聲搏激既而其響益大居人闢戶視之噴面波濤竟不可逼坐以伺旦其二水一涸一溢人以爲水闢竟不知其何怪

嗜水

孫皓以建業宮不利謀移都從步闡表徙武昌揚土百

姓泝流供給以爲患苦陸凱上疏曰武昌土地實危險而壻确非王都安國養民之處船泊則沈漂陵居則峻危且童謡言寧飲建業水不食武昌魚寧還建業死不止武昌居是明天意知民所苦矣皓還都建業

吳志

李贇皇作相日有親知奉使京口贇皇曰金山泉楊子江中冷水各置一壺其人舉棹醉而忘之至石頭城方憶乃汲一瓶歸獻李飲之曰江南水味大異頃歲此頗似建業石頭城下水其人謝過不敢隱

唐話林

唐李德裕任中書愛飲無錫惠山泉自錫至京置遊鋪號水遞有一僧謁見曰所謁相公者爲相公通無錫水

脉耳京師一眼井與惠山寺泉脉相通德裕大笑其荒
唐僧曰相公欲飲惠山泉當在昊天觀常住庫後取德
裕乃以惠山一甕昊天一甕雜以他水入甕暗記之遣
僧辨析僧因啜嘗止取惠山昊天二甕德裕大奇之卽
停水遁得免遁者之勞浮議遂息

芝田錄

張又新水錄唐李季卿刺湖州至維楊遇陸鴻漸謂曰
陸君善茶天下所聞楊子南冷水又奇絕今者二妙千
載一遇何可輕失乃命軍士謹信者挈瓶搯舟深詣南
泠陸潔器以待俄水至陸以杓揚水曰江則江矣非南
泠者似臨岸水使者稱不敢旣而傾諸盆至半遽止又

以杓揚之曰此南泠者矣使者蹶然駭曰某自南泠齋水至岸舟盪去其半懼其少取岸水增之處士之鑒也

李大驚

山堂肆考

王荆公當國蘇東坡出知杭州餞別荆公囑東坡大計入京過楊子乞攜江心水一瓶見惠東坡諾之至期經金山令人汲水一瓶携送荆公荆公云此必空瓶也啟視之果然蓋楊子江心水非銀瓶不注古有是言也

筆

談

韶州府東南五十里有湯泉能熟生物泉中時見赤魚游泳人不能獲金陵有半湯湖在府東北四十里水同

一壑而冷熱相半熟者可以淪雞中皆有魚魚交入他水輒死施顯卿曰湯泉熟物湯湖淪雞熱之極矣然中皆有魚游泳自得又入冷水輒死其與外夷火鼠常居火中若出火而人以水沃之卽死一類

奇聞類記

韓信將下趙聞陳餘不用李左車之計引兵方出井陘口師患無井筮之得蒙知山下有泉焉信遣胡將周而索之見二白鹿跑地有泉湧出後人於泉左立胡王祠祀之

金剛義記

夷道縣句將山下有三泉傳云本無此泉居者皆苦遠汲人人多賣水與之有一女子孤貧縵縷無以貿易有

一乞人衣麤貌醜瘡痍竟體村人見之無不穢惡唯女子獨加哀矜割飯飴之乞人食畢曰我感姬行善欲思相報爲何所須女答曰何恩可報且今所須之物非君能得因問所須女子曰正願此山下有水可汲乞人乃取腰中書刀刺山下三處卽飛泉湧出因便辭忽然不見

見

天中記

范仲淹知青州有惠政溪側忽湧醴泉遂以范公名之今醫家汲此丸藥號青州白丸子

廣輿

火井在蜀之臨邛今嘉定地有之其泉皆油熱之則然人取爲燈燭正德中方出古人雖博物亦未及此也

楊

漢宣帝使人上郡發磬石石室中得一人徒裸被髮反縛械一足以問羣臣莫能知劉向對曰此是黃帝時窶窳國二負之臣犯罪大逆黃帝不忍誅流之䟽屬山若有明君當時出外帝不信謂其妖言收向繫獄其子歆自出應募以救其父曰須七歲女子以乳之卽復變帝復令女子乳於是復爲人便能言語應荅如劉向之言帝大悅拜向太中大夫歆爲宗正卿詔曰何以知之歆曰出山海經

獨異志

時有石言於魏晉侯以問師曠曠曰石不能言或憑焉

臣聞之作事不時怨讟動於民則有非言之物而言今
宮室崇侈民力彫盡石言不亦宜乎

太平御覽

真女山山下際有石如人形高七尺狀如女子故名真
女峽古來相傳有數女取螺於此遇風雨晝晦忽化爲
石斯誠巨異難以聞信但啓生石中摯呱空桑抑亦相
類

水經註

前漢劉子光西征過山而渴無水子光在山南見一石
人問之曰何處有水石人不答乃拔劍斬石人須臾窮
山水出

獨異志

後漢光武夜至趙州南迷路聞人語問

之弗應見二人立傍怒拔劍斬之其一急走熟視之乃

石也

趙州志

南中有人採石石陷壓閉石罅中幸不死

饑甚只取石膏食之不知幾年後他人復採石見此人引之出漸覺身硬纔見風便化爲石又武昌山有嬭望夫不歸身化爲石

東坡集

永康王曠井上有一洗石時見赤氣後有二胡人寄宿忽求買之曠怪所以未及度錢子嬭孫氏覩二黃鳥闖於石上疾往掩取變成黃金胡人不知索市愈急旣得撞破石內空段有二鳥處

異苑

晉武時吳郡臨平岍崩出一石鼓打之無聲以問張華華曰可取蜀中桐材刻作魚形扣之則鳴矣於是如言

聲聞數十里

峻靈山側有石如棋子每取之卽以紙錢拋神仙之下所取不得揀選取畢視之黑白相均

萬花谷

金陵有三大石甚古吳仲庶作守日夜夢三舉子求哀且曰若不垂佑明日當爲煨燼矣公甚異之詰旦徧問僚屬具莫解旣而視牒見狀申乞燒三醜石爲仄供修造之用公遂悟勅寺僧愛護元祐中毛漸作漕欲移置廳舍掘之極深而石根不斷不能動遂罷

楊公筆錄

宋米芾好奇石知無爲軍初入州廨見立石頗奇喜曰此足以償吾懷命取袍笏拜之每呼曰石丈爲言者所

彈

石林燕語

武清縣民家石臼與隣家輅軸皆自滾至麥地上跳躍相鬪鄉人聚觀以木隔之木皆損折鬪不可解至晚方息鄉人怪之以曰沈汚池中以軸墜深坎相去各百餘步其夜軸與臼復鬪於池邊地上麥苗皆壞秀才李廷瑞聞之亟往觀焉鬪猶不輟乍前乍却或磕或觸砰然有聲火星炸落三日乃止唐天寶中汝南葉縣有二土塊相鬪中有血出數日不止後齊河清中殿上石自起兩兩相擊

筆叢

池井洞劫灰土海

附湖

蜀伏龍山下地窪若池以火引之有聲噫噫也地中少
頃炎熾夏月積雨停水則焰生水上市爲之沸而寒如
故冬月水涸則土上有焰如燒人聚而觀之至焚其衣
裾一統志

井之精名觀狀如美女好吹簫以其名呼之卽去一云

井鬼名瓊白澤圖

烏山下無水魏末有人掘井五丈得一石函函中得一
龜大如馬蹄積炭五枝於函傍復掘三丈遇磐石下有
水流洶洶然遂鑿石穿水比流甚駛俄有一船觸石而
匠人窺船上得一杉木板板刻字曰吳赤烏二年八月

十日武昌王子義之船

玄怪錄

臨汜縣有廖氏世老壽後移居子孫輒殘折他人居其故宅復累壽乃知是宅所爲不知何故疑井水赤乃掘井左右得古人埋丹砂數十斛丹汁入井是以飲水而得壽

搜神記

廣州大奚山有洞每歲五月五日洞開土人備墨紙入以手摸石壁覺有鐫刻罅隙者以墨刷印出視或呪語或藥方應用無不效驗洞亦隨閉

文昌錄

漢武鑿昆明池見灰墨無復土舉朝不解以問東方朔朔曰可問西域胡至後漢明帝時外國道人入洛陽有憶

方朔言者以問之胡曰天地大劫將盡則劫燒此劫之餘也

曹氏志怪

俗說天地初開闢未有人民女媧搏黃土爲人劇務力不暇供乃引繩組泥中舉以爲人故富貴賢知者黃土人也貧賤凡庸者引組人也

風俗通

晉文公出亡過五鹿乞食於野人野人舉塊以與之公怒將鞭之舅犯曰天賜也民以土服又何求焉天事必象十有二年必獲此土歲在壽星必獲諸侯其以戊申乎申上也再稽首而載之

晉史乘

子貢問於孔子曰賜爲人下未知所以爲人下之道也

孔子曰爲人下者其猶土乎種之則五穀生焉掘之則
甘泉出焉草木植焉禽獸育焉生人立焉死人入焉多
其功而不言爲人下者其猶土乎

北苑

蜀王獵於褒谷見秦王以金一笥遺蜀王蜀王報以禮
物盡化爲土秦王大怒臣下拜賀曰土地也今秦當得
蜀矣

本紀

建中初魏縣西四十里忽然土長四五尺數畝里人駭
異之明年魏博田悅反德宗命河南馬燧潞州李抱真
討之營於陘山幽州朱滔恒州王武俊帥兵救田悅王
師退保魏縣西朱滔武俊田悅引軍與王師對壘三年

十一月朱滔僭稱冀王武俊稱趙王田悅稱魏王悅時
壘正當土長之所及僭署告天乃因其長土爲壇以祭
魏州功曹韋稔爲土長頌曰益土之兆以媚悅馬燧聞
之笑曰田悅異常賊也

舊唐志傳

宋宣和中蜀人王俊明日汴都王氣盡矣吾夜以水盆
置氏房下望無一星照汴分野更於平宣門外密掘土
二尺取塊嗅枯燥無生氣天星不照土脉又絕遂上書
乞遷都洛陽

夷堅志

浙間以牛乳爲素食佛以爲冷嘉定間黃子中大諫言
向在廣中見韶陽屬邑乳源民訴於漕司與民爭乳田

親引而問之何謂乳田民曰鄉中有地種乳先掘地成
窖以粳米粉鋪於窖內以草蓋之用糞壤壅之候雨過
氣出則發開而米粉已化成蛹如蟻蟪狀取蛹作汁以
米粉潰而蒸成乳食之韶陽乃六祖禪師顯化道場而
彼中却爲此不知其故恐鄉原不以牛乳爲食耳

朝野

遺記

海龍王宅在蘇州東入海五六月程小島之前濶百餘
里四面海水粘濁此水清無風而浪高數丈舟船不敢
輒近每太潮水漫沒其上不見此浪船則得過夜中遠
望見此水上紅光如日方百餘里上與天連船人相傳

龍王宮在其下

錄異記

海者乃毘盧遮那如來所都實報無障礙土也溟滓誕
宕罔測邊涯玄冥淵深罕窮頂底諸佛身雲遍現其中
大根薩埵優游其處惟佛與佛乃能盡知色相莫求名
言難議爲喻初心令生信樂熏種植物因耳

萃嚴

海有須彌山微塵數風輪所持其最上風輪名殊勝威
光藏能持普光摩尼莊嚴香水海此海中出大蓮花名
種種光明藥香幢此華幢上有大寶地平坦清淨具衆
嚴飾此寶地外存大金剛輪圍山周匝圍遶此輪山內
大地之上有十不可說佛刹微塵數香水海一一海中

有一蓮花持一世界種一一種中皆二十重世界遍布其中經中不能盡示故只言一百一十一箇香水海其中最中央香水海名無邊妙華光出一蓮花名一切香摩尼王莊嚴有世界種名遍照十方熾然寶光明有二十重世界遍布其中其最下第一重中有勝光世界佛刹微塵數世界圍遶如是次第倍倍增上至第十三重娑婆世界有十三佛刹微塵數世界圍遶至第二十重妙寶燄世界二十佛刹微塵數世界圍繞此妙華光海外有十箇香水海右旋圍繞謂離垢燄藏香水海乃至天城寶堞香水海等其離垢海外次有變化微妙身香

水海等十海至金剛山下有香水海名頗梨地上有四
重世界其次右旋九十海亦如是共有一百一十一箇
香水海都盧大金剛山內所有境界總名華藏莊嚴世
界也

示相經

東海之別有渤海南海之別有漲海西海之別有清海
北海之別有瀚海猶五岳之外有五鎮也

魏林伐山

晏

子曰吾聞江深五里海深十里

齊記

千里石塘在崖州海面之七百里外相傳此石比海水
特下八九尺海船必遠避而行一墮卽不能出矣萬里
長堤出其南波流甚急舟入迴溜中未有能脫者又有

鬼哭灘極怪異舟至則沒頭隻手獨足短禿鬼百十爲羣爭來趕舟人以米飯頻頻投之卽止未聞有害人者

海槎餘錄

流波山下有然海千里民汲之以代油光明過於油數倍秦始皇使人汎千艘往山中取仙草舟人不知水性夜以燭跋投水中火大發遍海延燒火光接天千里一色無一人還者自此無人敢操舟入惟於海畔汲用而已

漂粟手牘

秦始皇於海中作石橋海神爲之豎柱始皇求爲相見神云我形醜莫圖我形當與帝相見入海四十里見

海神左右莫動手工人潛以脚畫其狀神怒曰帝負約
速去始皇轉馬還前脚猶立後脚隨崩僅得登岸說者
溺死於海衆山之石皆傾注今猶岌岌東趨

三齊畧記

秦始皇夢與海神戰如人狀問占夢博士曰水神不可
見以大魚蛟龍爲候乃令入海者賞捕巨魚具而自以
連弩候大魚出射之自琅琊北至榮成山弗見至之罘
見巨魚射殺一魚

史記

唐天寶初安思順進五色玉帶又於左藏庫中得五色
玉上怪近日西貢無五色玉令責安西諸番番言比年
常進皆爲小勃律所劫不達上怒欲征之羣臣多諫獨

李林甫贊成上意且言武臣王天運謀勇可將乃勅四萬人兼統諸番兵伐之及逼勃律中有術者言將軍無義不祥天將大風矣行數百里忽驚風四起雪花如翼風激小海水成冰柱起而復摧經半日小海漲湧四萬人一時凍死惟蕃漢各一人得還具奏玄宗大驚異卽勅中使隨二人驗之至小海側冰猶崢嶸如山隔水見兵士屍立者坐者瑩徹可數中使將返冰忽消釋衆屍亦不復見

名山藏

端宗乙亥元伯顏軍皇亭山宋奉璽以降及聞廣王益王如婺州卽命分兵屯守諸門范文虎安營浙江沙澣

太皇太后望祝曰海若有靈當使波濤大作一洗而空之而海潮三日不至師迄無虞於是元獲占地利宋都
以覆及祥興己卯元師下廣海張弘範遂進攻厓山衆
欲退師少休而是日海潮不退勢難廻却於是元人盡
日力戰帝及樞密使陸秀夫楊亮節皆溺死而宋祚以
滅嗟夫天若助宋必無此事可爲長嘆

癸辛雜志

四海之潮皆暗漲惟浙有明潮八月十八日杭人謂之
潮生日偕候江干斜陽風色陡寒海門潮起遠若白練
橫江而下瞬息千里近觀則勢若山嶽奮若雷霆吼風
噴雪移岸捲雲一段奇景卽工畫者莫能描其盛

四季

須知

宋紹興八年八月十八日觀潮前期二夕江干民間空中語曰當死於橋下者數百皆兇淫不孝之人其有名未果來者當分促之不預此籍者宜斥去又聞應聲者甚衆民皆駭怪次夜跨浦橋畔人夢有一人來戒者云來日勿登橋隣橋數家夢皆同次日觀潮橋上人皆滿得夢者見有親戚在橋急勸使去人以爲妖妄不信須臾潮至驚濤壞橋壓溺死數百人旣訪其死者平昔固皆不逞輩

西湖志

河江湖城

太華仙掌辨云昔河自積石出於西流既越龍門遂瀾南馳者數千里折波左旋將走東溟連山塞之壅不得去河神巨靈以手擘開其上以足蹈離其下中分爲兩以通河流今覩手跡於華嶽上指掌之形具在腳跡在首陽山下亦在焉

述征記

華山首陽本一山巨靈擘開

面北者爲首陽面南者爲太華

志語

秦莊襄王三年甲寅黃河清經曰黃河五百年一清聖人五百年一出此聖人受命王者革命之象速則二十年後緩則三十年後遠則四十年後應之是年甲寅漢高祖生於豐沛

原始秘書

隋楊素伐陳率水軍東下舳艫蔽江旌甲耀日素錦袍
玉帶坐平乘大船容貌雄偉陳人望之懼曰清河公卽

江神也

隋書

唐郭汾陽鎮蒲欲造浮橋而水急毀埤公酌酒許以小
女妻之其夕水退木立埤上遂成橋而小女尋卒因塑
像廟中人因立公祠號河瀆親家翁

乾
饌子

唐李彥佐在滄景太和九年有詔詔浮陽兵北渡黃河
時冬十二月至濟南郡使擊冰進舟冰觸舟覆詔失彥
佐驚懼不寢食者六日乃令津吏不得詔盡死吏懼具
請公一祝禱於河冀憑盼嚮而有以復也彥佐乃令具

爵酒及祝傳語詰河詞卒忽有聲如雷河水中斷可三十丈乃沉鈎一鈎隨鈎而出封角如舊惟篆印微濕耳

唐闕史

唐陸元方爲觀察御史武后時使嶺外涉海風濤元方曰吾受命不私神豈害我趣使濟而風濤頓息

稟死

宋王狀元十朋未第時醉墮沛河爲水神扶出曰公有三百千料錢若死於此何處消破明年遂登第士有久不第者亦效之陽醉落河河神亦扶出土大喜曰我料錢幾何神曰吾不知也但三百甕黃蓋無處消破耳

蘓

黃滑稽帖

桓宣武在南州與會稽王會於溧州漾舟江側謝公亦
在坐狂風忽起波浪鼓湧非人力所致桓有懼色會稽
亦微異惟謝怡然自若頃間風止桓問謝曰向那得不
懼謝徐笑曰何有三才同盡理

金陵志

吳十二年冬十月濟東塘之楊林江水出火可以燃物
九江志

趙昱嘗隱青城山隋煬帝起爲嘉縣太守時犍祖潭口
有老蛟爲害昱率甲士十人夾江鼓噪昱持刀入水有
頃江水盡赤昱左手持蛟首右手持刀奮波而出隋大
亂隱去不知所終後嘉陵水漲蜀人見昱青霧中騎白

馬從數獵者於面過宋太宗封神勇大將軍廟食灌江

口

方輿勝覽

徽歛黃墩湖一名蛟湖其湖有蜃常與呂湖蜃關程霽
銑好勇而善射夢蜃化人告之曰吾爲呂湖蜃厄君若
助吾必厚報束帛練者我也明日靈銑彎弓射之正中
後蜃後有一道教靈銑求善墓地靈銑隨陳武帝有功

爲佐命功臣

玄怪錄

不夜城在陽遷東南蓋古有日夜出此城以不夜名異
之也一曰日夜出於東萊故名

齊地記

堯聽四岳之言用鮪脩水鮪曰帝遭天災厥黎不康乃

築城以衛君造廓以守民此城郭之始也

吳越春秋

城高五丈而樓季不輕犯也太山之高百仞而跛羊牧其上夫樓季也而難五丈之限豈跛羊也而易百仞之高哉峭塹之勢異也又曰秦形勝之國也帶河阻山縣隔千里持戟百萬秦得百二焉地勢便利其以下兵於諸侯譬猶居高屋之上而建瓴水

史記

昔秦人築城於武周塞內以備胡城將成而崩者數次有馬走一地周旋反覆父老異之因依以築城城乃不崩

水經註

江陵舊城關羽所築羽北圍曹仁呂蒙襲而據之羽曰

此城吾所築不可攻也乃引而退

三國志

吳興郡城秦時爲下菰城又爲項王故城晉郭璞欲移郡於東遷璞女亦善於地理啓璞無徙因舊址損益之可以永無殘破之慮璞從之初璞欲移城於東遷每立標輒爲飛鳥啣去會其女又啓遂定於今處女號遷城

小娘子從璞廟祀

尚書璞記

晉朱序鎮襄陽符堅遣兵攻之序母自登城履行謂西北角當先受敵遂領百餘婢并城中女丁於其角斜築城二十余丈賊攻西北角果潰衆守新城賊遂引去襄陽人謂此城爲夫人城

晉書

自丹陽郭東南登舟行四十五里爲呂城又十里爲奔牛相傳梁武帝時有人於石城掘得一僧瞑目坐土中遂奏於帝帝問誌公誌公曰此入定耳可令人於其旁擊磬則出定矣帝命試之果開目帝與誌共臨問之無語誌話其前事云云其僧一視誌卽起身向南而奔去帝令人隨追之僧奔至此地而止追使迫之遂化爲牛地因是爲名

白醉頊言

金高琪請修南京裏城金主曰此役一興民茲病矣城雖完固能獨安乎高琪固請築之旣而金主慮擾於民募人能致甃五十萬者遷一官百萬升一等於是平陽

判官完顏阿剌左廂譏察霍定和發蔡京故居得二百萬有奇准格遷賞金主一日問曰人言此役恐不能就高琪曰苟防城有法正使兵來臣等愈得效力金主曰與其臨城曷若不令至此爲善高琪無以對及城成高琪受金帛之賞建碑書功於會朝門

塞

附關

市

巔

溝澤

陵墓

秦築長城土皆紫色謂之紫塞南徼土色丹謂之丹徼塞者壅塞夷狄也徼遠也

市物都原

穆天子傳曰天子射鳥獵獸於鄭圃命虞人掠林有虎在於葭中天子將至七萃之士高奔戎生擒虎而獻之

天子命之爲押畜之東虞是曰虎牢矣然則虎牢之名自此始也秦以爲關漢乃縣之

水經注

太上皇徙長安居深宮悽愴不樂高祖竊因左右問其故以平生所好皆屠販少年酤酒買餅鬪雞蹴踘以此爲懽今皆無此故以不樂高祖乃移置豐縣於驪山下徙豐諸故人實之號曰新豐太上皇乃悅故新豐多無賴無衣冠子弟故也高祖少時常祭枌榆之社及移新豐亦還立焉高帝旣作新豐并移舊社衢巷棟宇物色惟舊士女老幼相携路首各知其室放犬羊雞鴨於通塗亦競識其家其匠人胡寬所營也移者皆悅其似而

德之故競加賞贈月餘致累百金

西京雜記

欽州馬援征交阯立銅柱其下以表漢界嶺產茅草南北異向至今猶然

括地

岑參詩云鴈塞通鹽澤龍堆接醋溝二名甚工闕澤十三州志云山氏城北爲高踰淵又東北醋溝水出焉水在中牟又郭緣生述征記云醬魁城至醋溝凡十里○鹽澤見漢書匈奴傳

記曰斷木

秦始皇大興厚葬營建冢壙於麗戎之山一名藍田其陰多金其陽多玉始皇貪其美名因而葬焉斬山鑿石下涸三泉以銅爲槨旁行周迴三十餘里上畫天文星

宿之象下以水銀爲四瀆百川五岳九州具地理之勢
宮觀百官奇噐珍寶充滿其中令匠作機弩有所穿近
輒射之以人魚膏爲燈燭取其不滅者久之後宮無子
者皆使殉葬甚衆墳高五丈週迴五百餘里作者七十
萬人積年方成而周章百萬之師已至其下乃使章邯
領作者以禦難弗能禁項羽入關發之以三十萬人三
十日運物不能窮關東盜賊銷桮取銅牧人尋羊漏火
延燒九十日不能滅齊人傳

膠西相董仲舒墳在長安人爲致敬過者必下馬名陵
後人語訛爲蝦蟇陵非是

漢武帝崩後見形謂陵令薛平曰吾雖失勢猶爲汝君
柰何令吏卒上吾陵磨刀劍乎自今以後可禁之平頓
首謝因不見推問陵傍果有方石可以爲礪吏卒常盜
磨刀劍霍光欲斬之張安世曰神道茫昧不宜爲法乃
止故阮公咏懷詩曰失勢在須臾帶劍上吾丘

漢武故

事

壻水東運七女冢冢夾水羅布如七星高十餘丈周廻
數畝漢元嘉六年大水破墳墳崩出銅不可稱計得一
磚刻云項氏伯無子七女造槨世人疑是項伯冢

貝翻

註

魏征南軍司張詹墓墓有碑碑背刻云白揪之棺易朽
之裳銅鐵不入凡噐不藏嗟矣後人幸勿我傷自後古
墳舊冢莫不夷毀而是墓至元嘉初尚不見發六年大
水蠻饑始被發掘說者言初開金銀銅錫之噐朱漆雕
刻之飾爛然有二朱漆棺棺前垂竹簾隱以金釘墓不
甚高而內極寬太虛設白揪之言空負黃金之實雖意
固於南山寧同壽乎湍水

晉平公過九原而歎曰嗟乎此地之蘊吾良臣多矣若
使死者起也吾將誰與歸乎叔向對曰其趙武乎平公
曰子黨於子之師也對曰臣敢言趙武之爲人也立若

不勝衣言若不出於口然其身舉士於白屋下者四十
六人皆得其意而公家甚賴之及文子之死也四十六
人皆就賓位是以無私德也臣故以爲賢也平公曰善
夫趙武賢臣也相晉天下無兵革者九年春秋曰晉趙
武之力盡得人也

經濟類編

管輅別傳曰輅嘗隨軍西征過母丘與之墓而歎謂士
友曰玄武藏頭青龍無足白虎衝尸朱雀悲哭四危已
備法應滅族至母丘儉後其言如左券

山海經

晉羊祜時有善相墓者言祜祖墓有帝王氣鑿之則無
祜遂鑿之相者見曰猶出折臂三公而祜竟墜馬折臂

位至公無子

史編

陰縣佞子家貨萬金而自少小不從父語父臨亡意欲葬山上恐兒不從故命言葬我著渚下石磧上佞子曰我由來不奉教今從語遂盡散家財作石冢積土繞之成一洲長數百步晉元康中始爲水所壞今石皆如半榻許數百枚聚在水中佞子是前漢人

水經註

五胡時慕容雋夢石虎齧其臂寤而惡之購求其尸而莫知之後宮嬖妾言虎喪東明觀下於是掘焉下度三泉得其棺剖棺出尸尸僵不腐雋罵之曰死胡安敢夢生天子也使御史中尉楊約數其罪而鞭之

玄覽錄

後周李建勳且死戒家人曰時事如此吾得良死幸矣
勿封土立碑聽人耕種於其上免爲他日開發之懼及
江南之亡貴人家無不發惟建勳冢莫知其處

綱目

唐明皇不得其死人罕知之後溫韜發其陵見皇頭乃
破兩半以銅絲縫合豈殺三子納兒婦遂假手輔國耶
宋吳越檢校禮部尚書錢文炳元璪姪也顯德中入京
爲供奉開寶五年其妻丘氏卒炳幼精青烏之兆得一
穴於報恩院側古松林中有僧常泰云此地據山之崗
當是古賢之墓尚書不可重營炳不從督役開之果古
墓也石板數重柩已成灰惟骸骨在石上長逾丈所脛

骨三尺明若金色東畔一銅鐺皆青花西畔一古劍已碎餘大玉環在靴亦玉刻爲合抱芙蓉玉色瑩然炳心欲之不令後入自酌而下忽一黑蜂大如球子從劍下飛出於炳右眉螫之炳便悶倒頭大如斗輿還而卒常泰揜之翌日其子知玄號踊之極冥然困睡忽夢一古丈夫長丈餘被魚鱗甲握大劍跣足足色如金前語玄曰我帝堯時繇余氏也與陶臣氏烏陀氏同禹理水以功封吳卒葬於此當時此地乃海東漸之山也宅兆甚吉居之極安汝父開吾石板固已非義而輒欲奪吾玉劍過孰大焉今雖擊死然隸吾籍中吾在冥府大有所

主汝父且無苦勿念之遂驚覺由是推之墓之吉凶始自盤古由堯至於開寶幾數千年矣各有定分則不可妄干審墓地者鑒之

軍士有欲發孔子墓者金粘沒喝問其通事高慶裔曰孔子何人曰古之大聖人粘沒喝曰大聖人墓安可發遂殺軍士而嚴其禁

綱目

昔波斯人來閩相古墓氣乃謁墓隣以錢數萬市之墓隣不肯波斯曰汝無庸爾也此墓已無主五百年矣墓隣始受錢波斯發之見棺衾臙肉潰盡惟心堅如石鋸開觀之有佳山青碧如畫傍有一女靚妝凭闌凝睇蓋

此女有愛山水癖朝夕玩望吐吞清氣故能融結如此

潛溪文集

今南京孝陵城西門之內有吳孫權墓在焉當時築城者奏欲去之太祖曰孫權也是亦漢子且留他來把門遂得不毀

孤樹哀談

我明成祖定鼎金臺遂葬燕山其穴乃國師姚廣孝所點卽竇五桂之故居也前對一小玉几案姚公令挑去之云至尊無對迄今聖子神孫永奠靈長

筆潭

劉氏鴻書卷五

終